



Datë: 26.01.2026

Numër Protokolli: 409/2026

A.nr.1941/2025

Këshilli i Pavarur Mbikëqyrës për Shërbimin Civil të Kosovës – Kolegji për Shqyrtimin dhe Vendosje e Ankesave, në përbërje nga: Eshref Shabani -kryetar, Ardita Haxhnikaj-Demi dhe Malsore Gashi Bajraktari - anëtare, me Ilire Mehmeti-Shaqiri, në cilësinë e procesmbajtëses, në procedurë sipas ankesës me numër A.nr. 1941/2025 të datës 25.11.2025 të parashtruar nga ankuesja, A.T, kundër organit të punësimit/Komuna e Fushë Kosovës, në çështjen juridike “*Kontestim konkursi*” duke vepruar në pajtim me nenin 6 paragrafin 1 nën paragrafin 1.1, nenin 16 paragrafi 3, dhe nenin 18 paragrafin 1 nën paragrafin 1.8 të Ligjit Nr.06/L-048 për Këshillin e Pavarur Mbikëqyrës për Shërbimin Civil të Kosovës dhe Rregulloren Nr.02/2018 për Procedurën e Shqyrtimit dhe Vendorsjes së Ankesave në Këshillin e Pavarur Mbikëqyrës për Shërbimin Civil të Kosovës, me datë 26.01.2026, mori këtë:

V E N D I M

Këshilli i Pavarur Mbikëqyrës për Shërbimin Civil të Kosovës **shpallet jo kompetent** për të shqyrtuar dhe vendosur lidhur me ankesën A.nr.1941/2025 e datës 25.11.2025, e parashtruar nga ankuesja, A.T.

A r s y e t i m

A.T (në tekstin e mëtejme referuar: Ankuesja), me datë 25.11.2025 ka parashtruar ankesë me numër protokolli 7556/2025, të regjistruar nën shenjë A.nr.1941/2025 në Këshillin e Pavarur Mbikëqyrës për Shërbimin Civil të Kosovës, kundër konkursit me numër 882 të datës 20.08.2025 për pozitën Kuzhinier/ e NTM2 në IP të Drejtorisë së Arsimit në komunën e Fushë Kosovës.

Kolegji për Shqyrtimin dhe Vendorsjen e Ankesave (në tekstin e mëtejme referuar: Kolegji i Këshillit) nga administrimi i shkresave të lëndës ka gjetur se Këshilli i Pavarur Mbikëqyrës për Shërbimin Civil i Kosovës **nuk është kompetent** për të vendosur për ankesën me numër A.nr.1941/2025, të datës 25/11/2025, të parashtruar nga ankuesja A.T, **sepse:**

Nga administrimi i provave të lëndës rezulton se Komuna e Fushe Kosovës , me datë 20.08.2025 ka hap konkursin me numër 882 për pozitën e punës Kuzhinier/e NTM2 në Drejtorin e Arsimit për katër (4) vende të lira në të cilin konkurs ka marr pjesë edhe ankuesja, e cila me datë 12.11.2025 ka parashtruar ankesë pranë organit të punësimit ndërsa nuk ka marr asnjë përgjigje.

Ankuesja në ankesën e datës 25.11.2025 të parashtruar në Këshillin e Pavarur Mbikëqyrës për Shërbim Civil të Kosovës pretendon se rezultatet lidhur me konkursin e datës 20.08.2025 për Pozitën e punës Kuzhinier/e nuk janë publikuar në faqen zyrtare deri me datën 11.11.2025 duke u ngrit dyshimet se është bërë keqpërdorimi i sistemit të faqes zyrtare. Po ashtu ankuesja pretendon se pas shpalljes se rezultateve nuk është dhënë Këshill Juridike lidhur me të drejtën e ankesës, dhe se kandidatet e përzgjedhur nuk i plotësojnë kushtet lidhur me përvojën e punës andaj e njëjta konsideron se ky konkurs është përcjell me parregullsi të shumta dhe se i njëjti duhet te kthehet në pikën zero.

Kolegji i Këshillit në kuptim të pranueshmerisë së ankesës ju referua dispozitave të Ligjit Nr.08/L-197 për Zyrtarët Publikë, përkatësisht nenit 5 paragrafi 3 ku përcaktohet se: *3. Nëpunësja/i i shërbimit publik është zyrtarja/i publik i cili ofron shërbime publike të drejtpërdrejta për qytetarët në fushën e arsimit, shëndetësisë, kulturës, artit, në fushën e mjekësisë ligjore, si dhe shërbime tjera të ngjashme publike. Nëpunësja/i i shërbimit publik ushtron detyrën në pozitën përkatëse duke filluar nga niveli profesional deri në nivelin e lartë drejtues. Nëpunësja/i i shërbimit publik është edhe nëpunësja/i i shërbimeve të brendshme në administratën e shërbimeve publike pjesë e administratës shtetërore, në administratën e shërbimeve publike apo pjesë e komunës, dhe si rrjedhojë konstatoi se ankuesja për shkak të pozicionit të punës respektivisht pozitës të cilën ka konkurruar, pozita kuzhinier/e është pozitë e cila ofrojnë shërbime publike të drejtpërdrejta për qytetarët dhe nuk e ka statusin e Nëpunësit të Shërbimit Civil, por të njëjtit e gëzojnë statusin e **Nëpunësit të shërbimit publik** sikurse përcaktohet me nenin 5 paragrafi 1 nën paragrafi 1.2 dhe paragrafi 3 të Ligjit Nr.08/L-197 për Zyrtarët Publik.*

Andaj, meqenëse ankuesja ka parashtruar ankese kundër konkursit të datës 20.08.2025 për pozitën e punës kuzhinier/e e cila pozite nuk e ka statusin e nëpunësit civil, Kolegji i Këshillit, duke u bazuar në dispozitat e nenit 6 paragrafit 1 nën paragrafit 1.1 të Ligjit Nr.06/L-048 për Këshillin e Pavarur Mbikëqyrës për Shërbimin Civil të Kosovës, ku përcaktohet se Këshilli është kompetent që të shqyrtoj dhe të merr vendime vetëm për ankesat e nëpunësve civil dhe kandidatëve për pranim në Shërbimin Civil të Kosovës, vendosi që të shpallë veten jo kompetent për të vendosur lidhur me ankesën A.nr.1941/2025 të datës 25.11.2025, të parashtruar nga ankuesja A.T.

Rrjedhimisht, meqenëse se nga shkresat e lëndës rezulton se ankuesja ka parashtruar ankese brenda organit të punësimit, gjegjësisht e njëjti i ka konsumuar mjetet juridike – administrative, vendosi që lënda të mos bartet të organi kompetent në kuptim të dispozitave të nenit 75 paragrafi 1 të Ligjit Nr.05/031 për Procedurën e Përgjithshme Administrative, mirëpo palën e njëjtë e udhëzon të vijoj procedurën në gjykatë të rregullt.

Bazuar si më sipër, e në mbështetje të nenit 18 paragrafin 1 nën paragrafin 1.8 të Ligjit Nr.06/L048 për Këshillin e Pavarur Mbikëqyrës për Shërbim Civil të Kosovës, Kolegji i Këshillit vendosi si në dispozitiv të këtij vendimi.

Këshillë juridike: Vendimi hyn në fuqi në ditën e nënshkrimit nga Kryetari i Kolegjit. Pala e pakënaqur e cila pretendon se vendimi i Këshillit nuk është i ligjshëm, mund të iniciojë konflikt administrativ në Gjykatën Themelore në Prishtinë-Departamenti për Çështje Administrative, brenda afatit prej tridhjetë (30) ditësh nga dita në të cilën i është dorëzuar vendimi. Inicimi i konfliktit administrativ nuk ndalon ekzekutimin e këtij vendimi.

**KËSHILLI I PAVARUR MBIKËQYRËS PËR SHËRBIMIN CIVIL TË KOSOVËS
LËNDA, A.NR.1941/2025**

Ilire Mehmeti-Shaqiri

Procesmbajtëse

Eshref Shabani

Kryetar i Kolegjit

Vendimi i dorëzohet:

- *Ankueses A.T;*
- *Udhëheqësit të Personelit në Komunën e Fushe Kosovës ; dhe*
- *Arkivit të KPMSHCK-së;*